



sit 1947

Fasnacht 2010

**Alti Basler Dante**

## **Bioswiss isch Bio - Bschiiss**

D' Schwyz das isch e Bio-Land  
und europawyt bekannt.  
Vor viel Joorzähnte hän Pionier  
agfange mit däm Bio - Tier.

Denn isch die Bio-Wält no Bio gsy  
nit so wie hüt fascht alls derby.  
Wo Bio stoht, do isch's au drinn  
das wär jo eigentlich dr Sinn.

Doch hoppla, das isch gar nit woor,  
rächnet dr Grütter Peter vor.  
Im Aargau het är dr Rundi gmacht  
Und mänge het ab dämm nur glacht.

Jetzt lueg au aa und los gut zu:  
was är dört findet schtört d' Bio-Rueh.  
Vo 25 Betrieb sin gar 17 mangelhaft,  
jetzt gährt's ganz fescht im Bio-Saft.

Schnäll chunnt jetzt s' Jacqueline  
uf 's Podescht,  
für d' Bio-Suisse isch Bio s'Besch!  
Do git's nüt z'rüttle das isch wohr  
In 99,9 Prozänt chunt Bio vor.

Das isch nit überall dr Fall,  
zeigt uf dr Peter, s'git e Knall.  
Do bietet eine Menü a,  
sig alles numme Bio dra.

Im Kieler findet 's Amt au Sache  
wo nit nach Bio-Art kasch mache;  
's isch konventionell ufzoges Rind  
und Bio nur bim Koch im Grind.

So zahle d' Bio-Fän e grosse Batze,  
um täglich Bio-Sache z' schmatze,  
wo wenn si Glück hän Bio isch;  
und das zellt au für Gmies und Fisch.

E Schtudie het jetzt usegfunde:  
Mit Bio chasch nit besser pfunde.  
Dr Mage duet dir 's au nit danke,  
hesch dr Schisser, denn bisch  
e Bio-Kranke.

Und Bio - Diesel das isch gsund,  
„Die Armen sparn sich's ab vom Mund!“  
Au Bio - Gas het Ässe drin,  
macht das für d' Umwält wirklich Sinn?

Doch zrugg zue unserem Bio-Zässe,  
fascht hätti 's Wichtigschte vergässe:  
D' Bio - Pio wäre alli froh,  
hätt dr Coop nit ihres Label gno.

Denn ihri Knoschpe das muesch  
wüsse,  
isch gschtande für mit guetem Gwüsse,  
idiologisch, gsund und chemiefreie  
Sache.  
Wo d' nit in riese Mänge chasch  
mache.

Dr Coop het alles reduziert:  
In grosse Mänge wird produziert.  
Ai Produkt, ai Laschtwage, ai  
Liferschin;  
das spart Zyt, Killometer und viel  
Benzin!

So isch die Knoschpe halb verdorrt  
und Bio vielmol 's falschi Wort!  
Jetzt muess es uuse; ka's nüm  
verklemme:  
Bio-Bschiss muess me das nenne!!!

Dichter: Cuno Seiler

\*\*\*\*\*

*D Ladäärne-Uusstellig uff em Minschterblatz  
und  
D' Waage- und Reggwisyte-Uusstellig bi dr  
Kasäärne sin vom Määntig znacht bis am  
Mittwuch  
demoorge! Deert und an de 3 Verkaufsständ  
(CINS)  
in dr Stadt ka me n au alli Zeedel und  
Schnitzelbängg, d' Blaggedde und dr Rädäbäng  
kaufe.*

\*\*\*\*\*

Drugg: Oberli Druck und Medien GmbH,  
Basel